



21. august 2015

UKA 2015/82

Inatsisartut suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiupparput:

Nunatsinni sulisoqarniarnikkut sulisussarsiortarnermi aammalu sulisunik atatitsiinnarnissamut pissutsinik Naalakkersuisut qulaajaanermik suliaqartitsinissaannik Inatsisartut aalajangiiffigisassaattut siunnersuut. Qulaajaalluni suliap pingaartumik sammissavai inuiaqatigiittut ingerlatsinermi pingaarutillit suliffeqarfiit, soorlu peqqinnissaqarfik, atuarfeqarfiit, inunnik isumaginnittoqarfiit il.il., aamma ilanngullugu saqqummiunneqassapput suut suliniutit ingerlanneqarnersut innuttaasut suliffeqarnermut attaveqarniarnermikkut annaasaqarnissamut aarlerinaatillit pillugit. Qulaajaalluni suliaqarneq kingusinnerpaamik naammassineqarsimalluni Inatsisartunut saqqummiunneqassaaq Inatsisartut 2016-mi ukiakkut ataatsimiinneranni.

(Inatsisartunut ilaasortat, Steen Lyngé aamma Siverth K. Heilmann)

Tunngavilersuut:

Pisortat aamma namminersortut akornanni inuutissarsiortarnermi ingerlatsinermi sulisussarsiortarneq aamma sulisunik atatitsiniaaneq tassaavoq Kalaallit Nunaanni inuiaqatigiittut suliasaq annertoq imaannaangitsorlu.

Kalaallit Nunaanni sulisinnaasut amerlagisassaangillat, sulisinnaasunilu taakkunani ikittuinnaat qaffasissumik ilinniagaqarsimapput amerlanerpaartaallu ilinniagaqarsimanatik. Suliffeqarfiit akornanni sulisussaqaarniarnikkut unammillerneq atugaavoq, nunaqavissunillu sulisussarsinnaanngikkaanni, taava allatut ajornartumik avataaniit sulisussanik tikisitsisoqartariaqalertarpoq.



Naak Kalaallit Nunaanni sulisunik atatitsiniaanermik aamma sulisussarsiortarnermi iliuuseqartoqartaraluartoq, ajoraluartumik nassuerutigisariaqarparput sulisunik annertuumik taarseraattoqartarmat, tamanna susassa qarfinni pingaarutilinni erseqqarinneruvoq. Tamanna aningaasartornaannarani aamma taarseraannerup kingunerisaanik ilisimasanik annertuunik annaasaqartarnerit pisarput.

ATASSUT-mit isumaqarpugut maannakkut piffissanngortoq, aaqqissuulluakkamik qulaajaalluni suliaqartoqartariaqalernera Kalaallit Nunaanni sulisussarsiortarnermi aamma sulisunik atatitsiniaanermi, pingaartumik peqqinnissaqarnermi, atuarfeqarfinni aammalu inunnik isumaginnittoqarfinni suliffissaqarniarnikkut pitsaanerusunik sakkussa qartitsiniassagutta.

Erseqqissumik paasisariaqarpavut taarseraannerit qanoq annertutiginersut, qanorlu suliffiit akuerisaareersut inuttassa qartinniarneri inissisimanersut, suliffeqarfiillu ataasiakkaat sulisunik atatitsiniaanermi qanoq periuseqartarnerisut aammalu suut sulisussarsiortarnermi periaatsit ator neqartarnerisut.

Qulaajaalluni sulinermi aamma ersersinneqassapput innuttaasut suliffeqarnermut attaveqarniarnermikkut annaasaqarnissamut aarlerinaatillit suliffeqarfinni atatiinnarneqarnissaanut suliniutit.

ATASSUT-mit pingaartilluinnarparput namminersorluni inuutissarsiutillit aamma Kalaallit Nunaanni sulisartut kattuffiisa qulaajaalluni suliniummut peqataanissaannut. Taamatut illuatungeriinniit suliamut peqataanissamut kajumissuseqartoqarpat, taava aningaasartuutaajumaartussat naleqquttumik agguataarneqassapput.

Pisortanut aningaasatigut allaffissornikkullu kingunerisassat:

Naatsorsuutigineqarpoq siunnersuut kissaatigineqartoq Namminersorlutik Oqartussanut allaffissornerunermik kinguneqassasoq. Missiliuutigineqarporlu suliap katillugu AC-fuldmægtig-



imik ukiup affaaniit ukiup iluitsup tungaanut sulisoqarneq tassani nutserineq ilanngutereerlugu, tamanna 250.000-miit 500.000 koruunit tungaanut naleqarsinnaavoq.

Namminersorlutik inuussutissarsiuteqartunut aningaasatigut allaffissornikkullu kingunerisassat:

Apeqqutaalluni namminersorluni inuutissarsiutilli aammalu sulisartut kattuffii suliap ingerlanneqarneranut peqataarusussanersut, taava aningaasaqarnikkut aamma allaffissornikkut kinguneqarsinnaapput, naleqq. Pisortanut aningaasatigut allaffissornikkullu kingunerisassat.

Innuttaasunut aningaasatigut allaffissornikkullu kingunerisassat:

Soqannqilaq